

	<p style="text-align: center;">KOMMUNALE VEDTEKTER FOR SKULEFRITIDSORDNINGA (SFO) I ÅL KOMMUNE</p> <p style="text-align: center;">Vedtekne av kommunestyret 16.10.03 (sak 84/03) Endra i sektorutval for kultur og oppvekst 24.06.08 (sak 14/08) Vedtekne i kommunestyret sak 1/16 Endra i sektorutval for kultur og oppvekst 19.03.24 (sak 27/24)</p>
<p style="text-align: center;">§ 1 EIGAR</p>	<p>Ål kommune er eigar av SFO ved Nordbygdene skule, Nedre-Ål skule, Skattebøl skule og Torpo skule.</p>
<p style="text-align: center;">§ 2 FORVALTNING</p>	<p>SFO skal drivast i samsvar med Lov om grunnskoleopplæringa og den vidaregåande opplæringa (Opplæringslova) og dei forskrifter og retningslinjer som ei kvar tid gjeld for drift av SFO.</p> <p>Sektorutval for kultur og oppvekst (SUKO) er politisk fagutval. Endringar av vedtektene for SFO kan vedtakast av SUKO. Større endringar og prinsipielle endringar skal leggjast fram for kommunestyret.</p> <p>Det blir arrangert eitt møte for føresette kvart skuleår.</p>
<p style="text-align: center;">§ 3 FORMÅL</p>	<p>SFO er eit frivillig tilbod til barn før og etter skuletid i 1.-4. trinn, og for barn med særskilde behov i 1.-7. trinn. Der det er ledige plassar kan sektoren/skulen vurdere å gje tilbod til barn utover 4. trinn.</p> <p>SFO skal leggje til rette for leik, kultur- og fritidsaktivitetar og lekser med utgangspunkt i barna sin alder, funksjonsnivå og interesser. Ordninga skal gje barna omsorg og tilsyn. Funksjonshemma barn skal gjevast gode utviklingsmoglegheiter. Areal, både ute og inne, skal vere eigna for føremålet.</p> <p>Kommunen vil så langt råd er ha tilbod om SFO ved den einskilde skule, men er avhengig av tal påmeldte elevar.</p>
<p style="text-align: center;">§ 4 LEIING</p>	<p>Rektor har det overordna administrative og pedagogiske ansvaret for SFO-ordninga ved skulen.</p> <p>Rektor skal i samarbeid med dei SFO-tilsette utarbeide ein årsplan for verksemda. Planen skal innehalde mål, organisering og innhald for drifta. SFO-tilsette skal etter behov delta på skulen sine klasseforeldremøte og på konferansetimar.</p>

<p>§ 5 LEIKE- OG OPPHALDSAREAL</p>	<p>SFO har ei anna organisering av barnegruppa og eit anna innhald enn skulen. Dette krev at dei fysiske tilhøva ligg til rette. Skulen nyttar definert SFO-lokale som hovudbase, men kan også nytte andre rom på skulen ved behov. SFO nyttar uteområdet til skulen.</p>
<p>§ 6 BEMANNING</p>	<p>Bemanningsnormen er 1 vaksen pr. 12 barn. For barn med særskilte behov kan det tilsetjast ekstra personale etter sakkunnig vurdering og enkeltvedtak.</p>
<p>§ 7 SØKNAD OG OPPTAK</p>	<p>Opptaksperioden er for eitt år. Hovudopptak skjer om våren før nytt skuleår. Hovudopptaket blir kunngjort i lokalavisa og har søknadsfrist 1. mars. Søknader i hovudopptaket er avgjerande for dimensjonering av tilbodet ved kvar einskild skule.</p> <p>Det er løpande opptak elles i året, men dette er avhengig av ledig kapasitet utan at det skal tilsetjast fleire.</p> <p>Det må vere minst seks barn som er påmeldt samtidig ved kvar skule i hovudopptaket for at det skal opprettast eit tilbod. Er det færre enn seks barn som ynskjer SFO samtidig, bør samarbeid med barnehagar eller andre skular drøftast.</p> <p>Det er lagt til rette for elektronisk søknad. Denne er å finne på www.aal.kommune.no</p> <p>Rektor ved den einskilde skule har opptaksmynde. Skulen sitt vedtak om tildeling eller avslag på søknad er å rekne som enkeltvedtak etter forvaltningslova. Klage på skulen sitt vedtak skal sendast oppvekstkontoret via skulen. Klageinstans er SUKO.</p> <p>Det er ikkje høve til å kjøpe enkeltdagar når barn ikkje har SFO-plass.</p>
<p>§ 8 OPPTAKS- KRITERIUM</p>	<p>Fylgjande kriterium skal leggjast til grunn ved opptak av barn til SFO etter slik prioritet:</p> <ol style="list-style-type: none"> 1. Barn med nedsett funksjonsevne 2. Barn med spesielle behov 3. Nye barn skal takast inn etter alder slik at dei yngste blir prioritert
<p>§ 9 OPPSEIING</p>	<p>Oppseiing av SFO-plass, også delar av ein plass, skal skje med to månader varsel. Oppseiingar blir rekna frå den 1. i månaden etter at oppseiinga er motteke.</p> <p>Ved oppseiing etter 1. april skal det betalast for plassen fram til</p>

	<p>sommarferien.</p> <p>Det må vere minst seks barn som er påmeldt samtidig ved kvar skule i hovudopptaket for at det skal opprettast eit tilbod. Er det færre enn seks barn som ynskjer SFO samtidig, bør samarbeid med barnehagar eller andre skular drøftast.</p> <p>Dersom oppseiingar som fører til at det blir færre enn 6 elevar samtidig på SFO-tilbod ved ein skule, vil tilbodet bli lagt ned. Sjå §7 om samarbeid med barnehagar/andre skular.</p> <p>Oppseiingar av heile eller delar av SFO-plassen skal meldast inn via elektronisk skjema. Dette er lagt ut på www.aal.kommune.no</p> <p>Bytte av plass pga tilbod i kulturskulen kan meldast inn utan oppseiingstid innan 25. august på e-post til oppvekstkontoret@aal.kommune.no Endringar er avhengig av ledig plass.</p>
<p>§ 10 BETALING FOR SFO</p>	<p>SFO skal vere sjølvfinansiert og kommunen kan krevja utgiftene til SFO dekt gjennom eigenbetaling frå føresette. Mat i SFO kan kome i tillegg til sats for betaling frå føresette. Satsar for SFO blir fastsette i budsjetthandsaminga kvart år. Satsane kan endrast i løpet av året dersom ordninga går i underskot.</p> <p>Det blir sendt faktura fordelt på elleve månader.</p> <p>Føresette som fleire gonger ikkje hentar sine barn til rett tid, må etter ein skriftleg advarsel betale ein fastsett sats pr. påbegynt ½ time ved for sein henting.</p> <p>Ved manglande betaling frå føresette i meir enn to månader, blir det sendt varsel om oppseiing av plassen.</p> <p>Betalingsreglement er å finne på www.aal.kommune.no</p>
<p>§ 11 OPNINGSTID</p>	<p>Opningstid kl 07.30 til skulestart og frå skuleslutt til kl 16.30. Opningstida kan flyttast eller kortast ned etter kartlegging ved den einskilde skule.</p> <p>SFO er open på alle dagar som inngår i skuleruta.</p> <p>SFO er stengt i juli, jule- og påskeferie, på planleggingsdagar og andre fridagar i skuleåret jf skuleruta.</p> <p>Dersom ein elev ikkje kan møte på SFO som avtalt, må det meldast frå til skulen.</p>

<p>§ 12 FERIE-SFO</p>	<p>Ferie-SFO inngår ikkje i den ordinære påmeldinga.</p> <p>Nedre-Ål skule arrangerer ferie-SFO for alle skulane i kommunen. Det er ferie-SFO i juni, august, haust- og vinterferie. Påmeldinga er bindande. Det må vere minst åtte påmeldte kvar dag for at det skal opprettast eit tilbod om ferie-SFO.</p>
<p>§ 13 SKYSS</p>	<p>SFO er ei frivillig ordning. Elevar med SFO-ordning har ikkje rett på gratis skuleskyss dei dagane dei er påmeldt SFO.</p>
<p>§ 14 POLITIATTEST</p>	<p>Dei som skal arbeide i SFO må leggje fram tilfredsstillande politiattest jf. Opplæringslova.</p>
<p>§ 15 TEIEPLIKT</p>	<p>Alle som arbeider i SFO har teieplikt etter Forvaltningslova § 13.</p>